

QUANNO RIDE

Quanno ride,
e te rideno l' uocchie,
tu si' na refol' 'e viento
e spanne frisco addò
'a vita abbrucia 'e cchiù.

Quanno me guarde,
e 'o tiempo se ferma,
si' pure palomma o cardillo,
vulasse, cantasse,
e mille vote se ne jesse e turnasse,
ie, ammagato 'a stu nciarmo,
palomma e cardillo,
nemmanco 'e vedesse...

Ie, strevezo e sulagno,
smozzeco 'e stessi pparole
frezze spuntute,
piatte vacante,
mmane sperute e sfallute.

Quanno tu chiagne,
e s'annacqueno ll' uocchie,

varca sperduta addevento
c'affonna int' 'o mare
ca, chiano, te scenne pe' faccia.

Quanno tu ride,
e quanno tu chiagne,
nu sole d'ammore
m'allumma 'int' all'uocchie.